

# Diskriminashon

Bonerianonan ta "birando menos tolerante pa presensia di dominikanonan", korant a anunsiá. E komunidad dominikano a reakshoná ku no ta tur dominikano bibá na Boneiru ta problemátiko. Bèrdat, tin delinkuensia, pero mas parti esaki por ta atribuí na hóbennan dominikano ku ta metí den ilegalidat i dominikananan ku ta prostituí. E debate a sigui. Nos no por generalisá den kasonan asina. Tin hopi dominikano desente na nos isla ku ta duna un aporte na nos komunidad.

E spiertamentu pa no generalisá ta na su lugá. Ora nos generalisá, nos ta diskriminá. Komo boneriano nos tambe ta reakshoná defensivo ora un turista, pa motibu di un chòler òf un ladron, ta proklamá ku nunca mas e ke bishitá nos isla. Un ta dañá pa otro. Ora nos ta generalisá, ta komo sifuera nos ta tira henter un saku di batata den barí di sushi pasobra un batata ta putrí. Nos mester trata ku e un persona problemátiko i no klasifiká tur komo basura. Esei ta presisamente loke Beibel ta kondená ora e ta bisa "no husga" (Mateo 7:1).

Ma esaki ta e úniko ehèmpel di diskriminashon, husgamentu, parsialidat den nos komunidad?

No ta un sekreto ku nos tin un imagen mental negativo di dominikanonan, pa motibu di nan asosiasion ku prostitushon na nos islanan. Afortunadamente e idea aki ta kitando, ma ainda hopi bes nos ta husga tur dominikano a base di e impreshon inhustu ei. Nos tambe tin pensamentu diskriminatorio pa ku otro nashonalidat, manera haitiano. Asta nos ta diskriminá kontra nos mes, dunando e hulandes preferensia riba e yu di tera pa motibu di su koló i nashonalidat.

I kiko di diskriminashon a base di koló na Boneiru? Rasismo ta algu ku nos ta pensa ta aya...na Sùit Afrika, Alemania, i Merka. Resientemente un politico hapones hustamente a haña basta skual pa loke el a ekspresá, "Ora bo duna man na un hende kompletamente pretu, bo ta sinti bo man ta bira pretu." Nos a kustumá di tende ku tin ora antianonan na Hulanda ta tené abou pa motibu di koló òf mester enfrentá otro forma di diskriminashon. Ma lástimamente rasismo no ta aya so. Nos mester realisá ku e ta aki tambe.

Maske nos ta mas tolerante di diferente koló ku otro pais, tòg nos ta diskriminá a base di koló. Nos tin den nos kabes ku koló kla ta mihó. Si un pareha tin dos yu, un koló kla i e otro koló mas skur, hopi biaha nan ta duna preferensia na esun koló kla. Parsialidat! Muchanan na skol kruelmente ta yama un mucha mas skur "pretu" òf "neger." Rasismo! Mucha muhénan ta preferá un yònkuman ku "bon" koló i e hoben tambe ta deseá un yùfrou mas kla ku e mes. Dikon hobennan ta ekspresá e preferensia aki? Apel no ta kai leu di palu. Ta mayornan ku ta siña nan esaki ora nan ta enfatisá pa nan yunan buska un hende ku bon koló i bon kabei pa "drecha famia." Diskriminashon!

Ma ta ken di ku "bon" koló ta koló kla òf blanku? No ta Dios! Ta ken di ku "bon" kabei ta kabei las. Talbes nos Kreador a kiboká ora El a krea hende? Kisas Mormonnan tabatin rason antes ora nan a siña ku hende a bira koló skur komo un kastigu di Dios? Nò! Dios a krea tantu hende pretu, komo esnan maron, kuli, kòrá, blanku, skur, kla. El a krea kabei las i kabei krin. Tur loke Dios a krea ta bon! Nos Kreador no a hasi un kibokashon.

Ma nos si kier sa ku Dios a bendishoná algun mas ku otro pa motibu di nan koló. I un persona ku tin "bon" kabei i "bon" koló kier sa ku e ta mashá kos. Esei ta puru mentira. Ningun di nos por a skohe nos rasa. Ora nos ta trata hende a base di e aktitutnan aki, sea ta den famia, na skol, trabou, òf riba kaya, nos tambe ta kulpabel di diskriminashon i rasismo.

"No husga," Beibel ta bisa, "pa boso no wòrdu husgá. Pasobra ku e mes huisio ku boso husga, boso lo wòrdu husgá, i ku e mes midí ku boso midi ku né, boso lo ta midí" (Mateo 7:1-2). Dia ta bin ku nos lo wòrdu husgá pa nos Kreador. Dios ta hustu, E no konosé diskriminashon i parsialidat. Na shelu lo tin hende di tur rasa. No ta "bon" kabei i "bon" koló ku lo garantisá entrada den shelu. Kualke persona di kualke nashonalidat, rasa, i koló por dreña, basta ku e realisá ku e ta un pekador ku ta meresé kastigu eternu, i birando lomba pa piká i e ta konfia Kristo so pa skap'é di e kastigu ei.